

"Encuentro Aruba-Bonaire"**Lo bira un paquete cultural pa presente tambe na Curaçao, Hulanda y Belgica**

ORANJESTAD (AAN) -- Manera a sali publica den un articulo anterior, diasabra atardi DIARIO a comparti un par di ora cu un grupo di artista local na cas di Dolfi y Belen-Kock Marchena. E reunion tabata relaciona cu e introduccion na Bonaire di e Obra Literario "E Milager", e segundo coleccion di poesia di Belen-Kock Marchena, y con esaki a worde presenta na un manera dramatiza combinando declamacion cu canto y baile den un show cu a carga e nomber di "Encuentro Aruba-Bonaire". Den e atardi cultural y simpatico aki DIARIO a entrevista algun di e artistanan cu a acompaña e autor di e buki na Bonaire, y tambe e promotor di dicho actividad, Senador y Parlamentario Antiyano Edith Strauss Marsera.

EDITH**STRAUSS-MARSESA**

Edith Strauss- Marsera a bishita Aruba aña pasa den e cuadro di celebracion di 60 aña di existencia di Club Boneriano, den cual evento Belen Kock-Marchena a presenta su buki "E Milager" na un manera hopi diferente, creativo y special.

"Mi a topa cu un publico unda mayoria di hende ta di origen Boneriano pa kendenan Belen a haci un presentacion na un nivel hopi halto. Den e sala mi a pensa cu ta leuk si algo asina por worde haci na Bonaire.

Mi a propone Belen mi idea y mesora el a bisa mi cu esey ta un soño cu e tin caba. El a bisa mi cu Lydia Emerencia y Delbert Bernabella tambe ta descendiente Boneriano y cu e tambe ta kere cu lo ta hopi bon si Aruba y Bonaire por comparti un evento cultural cu por reforza tambe e lazonan di amistad", Edith Strauss a comenta.

Mesora cu el a yega Bonaire Edith a papia riba e proyecto aki cu diferente persona cu mescos cune tabata kier haci algo special e aña aki en conexion cu "Aña Internacional di e Grandinan".

"Ami como presidente di e -Fundacion Cuido y Bienestar di Grandinan na Bonaire-, a haya cu ta bon pa trece un grupo cultural

di asina bon nivel y alavez recauda fondo pa e Fundacion.

Mi a presenta e proyecto pa cual a ricibi un subsidio masha minimal, di manera cu mi mes a financia practicamente henter e proyecto. Mi a bende carchi y prome cu e grupo a yega Bonaire ya e localidadnan tabata full bendi, loke a cubri e gastonan di e sala. Pero nos a haya e bunita gesto di Padu Lampe di bende varios di su CD cu loke nos a haya algun ganashi pa e Fundacion.

Nos ta masha gradici cu e gesto aki y nos a keda hopi contento cu e presentacion cu a trece pa nos un anochi di alegria y un evento inolvidable pa nos grandinan".

Edith Strauss-Marsera a indica cu mayoria di e grupo cu a bay Bonaire tin lazonan familiar aya, loke a haci nan bishita mas aprecia ainda.

Di Bonaire mes tambe tin artistanan cu a participa den e anochi cultural "Encuentro Aruba-Bonaire".

"Chichi Everts, un poeta di edad grandi cu un inmenso talento pa skirbi y declama tambe a participa. Tres Boneriano cu origen Arubano a compaña Padu na Piano, y Dita Cicilia a bautisa su buki di poesia e anochi ey.

Mi por bisa cu e anochi aki tabata un berdadero encuentro entre Aruba y Bonaire", Edith Strauss-Marsera a comenta.

PADU LAMPE

Padu del Caribe, e Tata di Aruba su cultura, kier a keda masha cortico, segun e mes a bisa, pero no cu menos emocion el a expresa su mes.

"E experiencia aki tabata un revelacion masha bunita pa mi, ya cu mi no a spera algo asina. E forma con e publico a ricibi nos y a acepta Aruba a pone mi sinti hopi contento y orguyoso di por a tuma parti den un grupo cultural na nivel halto cu a hiba Bonaire algo di nos cultura.

Mirando e aplausonan caluroso mi por bisa cu ta un homenage y ovacion riba pia loke nos a ricibi. Sumamente contento mi a participa den un evento cu nos a trece

cu amor y entusiasmo pa e pueblo di Bonaire", Padu a menciona.

Padu ta contento cu tin hende den e grupo cu a lanza e sugerencia pa bin cu un paquete cultural pa presenta e show na Aruba un biaha mas, por ehemplo riba Dia di Bonaire, sea na Cas di Cultura of Club Boneriano mes. E intencion ta pa despues hiba e show pa Curaçao y Hulanda, na diferente ciudad, y si ta posible na Belgica, pa asina difundi aya nos dushi Idioma Papiamentu.

"Nos lo traha riba e proyecto aki pero pa por realice nos tin cu busca sponsors. UNOCA por ta un posibilidad, y kizas gobierno y ohala sector priva por duna nos un man".

ANUESCA BALLY

Anuesca Bally ta docente di Ingles na Colegio Arubano, y pa prome biaha el a participa declamando poesia. El a declara un di e poesianan di Belen Kock-Marchena, na Ingles.

"Nunca antes mi a haci algo asina,

pero e experiencia aki tabata inolvidable pa mi. Mi a enriquece cu hende manera Belen, Padu, Lydia Emerencia, Wilma Kuiperi, Delbert.

Nan di cu mi cu mi tin un potencial scondi", Anuesca a comenta.

Durante cu Anuesca a declama na Bonaire, Delbert Bernabella a acompaña cu Saxofon. E ta haya masha interesante un otro forma di trece poema cu expresion corporal, canto, declamacion, baile y musica (piano y saxofon).

"Pa mi esaki tabata un experiencia inolvidable y lo mi sigui contribui cu Belen ora e invita mi", Anuesca a acentua.

Den otro articulo DIARIO ta elabora riba e comentarionan di Lydia Emerencia, Wilma Kuiperi-Jansen y Belen Kock-Marchena.